

Pelancong Wuhan sumber jangkitan virus di gereja Grace Assembly

S'pura sekat pengunjung baru dari Cheongdo dan Daegu di Korea Selatan

► **ERVINA MOHD JAMIL**
ervinamj@sph.com.sg

MISTERI di sebalik kelompok jangkitan koronavirus terbesar di Singapura, melibatkan gereja Grace Assembly of God, kini terungkap hasil ujian baru yang dapat mengesan jangkitan lama dalam pesakit yang sudah sembuh.

Menggunakan ujian serologi atau serum darah yang dibangunkan Sekolah Perubatan Duke-NUS, pegawai Kementerian Kesihatan (MOH) dan polis berjaya menjejaki sumber jangkitan itu kepada dua pelancong dari Wuhan, China – Kes 8 dan 9.

Dalam pada itu, Singapura juga akan menyekat kemasukan atau perjalanan transit pengunjung baru yang telah ke Daegu dan Cheongdo di Korea Selatan dalam tempoh 14 hari lalu mulai 11.59 malam ini, ekoran jumlah kes jangkitan Covid-19 yang melonjak di kedua-dua bandar itu.

Sehingga 12 tengah hari semalam, terdapat

893 kes jangkitan virus itu di Korea Selatan, dengan 501 kes mempunyai hubungan dengan gereja Shincheonji Church of Jesus di Daegu dan 113 ada hubungan dengan Hospital Daenam di Cheongdo.

Dalam sidang media di Pusat Akhbar Nasional di bangunan Kementerian Perhubungan dan Penerangan (MCI) semalam, Menteri Kesihatan, Encik Gan Kim Yong, berkata Singapura juga boleh menjangkakan lebih banyak kes Covid-19 di sini sedang jumlah kes jangkitan virus itu terus meningkat di seluruh dunia.

“Kami akan meneruskan siasatan dan menjejaki kenalan rapat pesakit sementara memantau keadaan di seluruh dunia. Sedang situasi terus berubah, kami harus bersedia menjangkakan lebih banyak kes di Singapura dan di seluruh dunia,” kata Encik Gan.

Namun, beliau menggalak warga Singapura meneruskan kehidupan seperti biasa, dengan mengambil langkah berjaga-jaga yang diperlukan.

Menteri Pembangunan Negara Lawrence Wong yang bersama Encik Gan mempengerusikan pasukan bertindak khas untuk menangani penularan Covid-19 berkata warga dan penduduk tetap (PR) Singapura serta pemegang pas jangka panjang yang telah ke Cheongdo dan Daegu dalam tempoh 14 hari lalu akan diberi notis duduk di rumah (SHN).

Ini bermakna mereka tidak dibenarkan keluar rumah bagi tempoh dua minggu selepas pulang ke sini.

Dalam pada itu, satu kes baru dikesan di Singapura semalam, menjadikan pesakit itu kes ke-91 yang dijangkiti koronavirus di sini.

Kes 91 itu merupakan isteri kepada Kes 83, yang disahkan dijangkiti virus itu pada 19 Februari.

Hasil ujian serologi yang dijalani pasangan itu mengesahkan bahawa mereka telah dijangkiti Covid-19 pada lewat bulan lalu.

Menurut MOH, pasangan itu berada di gereja The Life Church and Missions Sin-

gapore pada hari yang sama Kes 8 dan 9, pasangan suami isteri dari Wuhan, berada di sana pada 19 Januari.

Kes 83 dan 91 kemudian menghadiri satu sambutan Tahun Baru Cina pada 25 Januari di Mei Hwan Drive yang turut dihadiri Kes 66 – seorang lelaki warga Singapura berusia 28 tahun yang disahkan dijangkiti virus itu pada 14 Februari.

Kes 66 bekerja di gereja Grace Assembly of God dan kemudian menjangkiti beberapa kakitangan dan anggota gereja tersebut.

MOH menyifatkan Kes 66 sebagai kes utama dalam kelompok di gereja Grace Assembly of God.

“Hasil ujian ini satu bukti penting yang mengesahkan hubungan antara kelompok gereja itu dengan dua pelancong dari Wuhan itu,” kata MOH.

Ini merupakan kali pertama hubungan antara kelompok jangkitan Covid-19 yang berbeza dapat dikenal pasti menggunakan ujian serologi. Ujian ini boleh dijalankan pada pesakit yang sudah sembuh.

Ujian makmal yang digunakan sekarang untuk mengesahkan jangkitan, dikenali sebagai ujian tindak balas rantaian polimerase

(PCR), berupaya mengesan bahan genetik virus dalam contoh yang diperoleh daripada pesakit termasuk cecair tubuh. Namun, ujian ini tidak berkesan sekiranya pesakit itu sudah sembuh.

Oleh itu, ujian baru ini dapat mengesan antibodi yang dihasilkan tubuh seseorang sebagai tindak balas terhadap jangkitan. Antibodi ini boleh terus wujud dalam badan individu terbahit selama beberapa tahun.